

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- प्रधानमंत्री नरेंद्र मोदी अज्ज बडुलै 11 बजे आकाशवाणी परा “मन की बात” च अपने बचार सांझे करडन।
- एल.जी मनोज सिन्हा होरें उधमपुर च हाड़ें दरान नुकसान पुजे दे 341 घरें दे परतिये निर्माण कम्मै दा नीहू पत्थर रक्खेआ।
- उपमुख्यमंत्री होरें अखनूर च 119 करोड़ रपे दी लागत कन्नै बनाए जा करदे परगवाल पुल परियोजना दे कम्में दी समीक्षा कीती, अगले बरै मार्च-अप्रैल तगर कम्मै गी तोड़ चाढ़ने दे निर्देश दित्ते।
- बी.एस.एफ नै शुरूआती कोहरे बश्कार जम्मू अंतरराष्ट्री सरहद पर निगरानी बदाई।
- राजौरी दे जिला मैजिस्ट्रेट होरें गलत इस्तेमाल गी रोकने ताई समूलचे जिले च बी.पी.एन सेवां गी तुरत प्रभाव कन्नै 2 महीने लेई मुअत्तल करने दे निर्देश जारी कीते।

<><><><><><>

PM-MKB

प्रधानमंत्री नरेंद्र मोदी होर अज्ज अपने रेडियो कार्यक्रम “मन की बात” दे राएं देश-बदेश च रौहने आहले श्रोताएं कन्नै अपने बचार सांझे करडन। अज्ज दिनै 11 बजे प्रसारित होने आहले इस कार्यक्रम दी एहू 128मीं किशत होग। एहू कार्यक्रम आकाशवाणी समाचार दी वैबसाईट newsonairmobile ऐप्प पर बी प्रसारित कीता जाग। एहूदे कन्नो-कन्नी एहू प्रोग्राम आकाशवाणी समाचार, DD News, प्रधानमंत्री हुं’दे दफ्तर ते सूचना ते प्रसारण मंत्रालय दे यू-ट्यूब चैनलें पर बी प्रसारित कीता जाग। आकाशवाणी जम्मू पर मन की बात दे तुरत मगरा एहूदा डोगरी भाषा च अनुवाद प्रसारत कीता जाहग।

डोगरी अनुवाद स्टाडे श्रोता अज्ज राती 8 बजे इक बारी परतियै सुनी सकदे न। आकाशवाणी दा क्षेत्रीय समाचार एकांश जम्मू अज्जै दे मन की बात कार्यक्रम पर इक विशेष परिचर्चा रातीं साड्डे 10 बजे प्रसारत करोग जिसी तुस स्टाडे इस्से चैनल मिडीयम वेव 303 मीटर यानि 990 किलोहार्टस ते एफ.एम. 100.3 मैगाहार्टस पर सुनी सकदे हो।

<><><><><><>

LG-Udhampur

उपराज्यपाल मनोज सिन्हा होरें कल उधमपुर च इस बरै अगस्त म्हीने कुदरती आपदा करी घरें गी पुज्जे दे नुकसान दे मद्देनजर 341 घरें दे परतिए निर्माण लेई नीहू पत्थर रक्खेआ। इस परियोजना पर 34 करोड़ रपे दी लागत औग ते एहदी अमलावरी एच.आर.डी.एस-इंडिया दे सहयोग कन्नै कीती जा'रदी ऐ। संगठन प्रति आभार जतांदे होई उपराज्यपाल होरें आखेआ जे इस जत्त कनै हाडें करी प्रभावित परौआरें गी परतिए बहाल करने च मदद थ्होग। उनें आखेआ जे 2019 मगरा सरकार नमी उर्जा कन्नै कम्म करा करदी ऐ तां जे केंद्र शासित प्रदेश दा विकास होई सकै, लोकें दिएं आसैं-तांगें गी पूरा कीता जाई सकै। इस मौके पर बोलदे होई उपराज्यपाल होरें आखेआ

<><><><><><>

Dy CM Akhnoor

उपमुख्यमंत्री सुरेंद्र चौधरी होरें अखनूर च 119 करोड़ रपें दी लागत कन्नै बनाए जा रदे परगवाल पुल परियोजना दा जायजा लैता। इस मौके पर विधायक मोहन लाल, वरिष्ठ अधिकारी ते होर दुए लोक बी मौजूद हे। उपमुख्यमंत्री होरें कम्मै गी मार्च-अप्रैल 2026 तगर पूरा करने लेई आखेआ। चनाव पर बनाए जा'रदे इक ज्हार 640 मीटर लम्मे पुल दे बनी जाने कन्नै परगवाल, जोड़ियां, खौड़, प्लांवाला ते आले-दोआले दे इक लक्ख लोकें गी लाहू होग। एह पुल छम्ब ते अखनूर बश्कार इक राबता कायम करोग। उनें एजेंसिएं गी कम्मै दा म्यार बनाई रखने ते इसी समेंसिर कम्म पूरा करने पर जोर पाया।

<><><><><><>

Rana-Education

जनजातीय मामलें दे मंत्री जावेद अहमद राणा होरें धारना मेंबर च इक संस्थान दे सालान दिवस च बोलदे होई आखेआ जे इक प्रगतिशील ते जागरूक समाज लेई बेहतर शिक्षा अत्त लाजमी ऐ।

उनें विद्यार्थियें गी सख्त मेहनत करने लेई प्रेरित कीता ते सरकारी मदद दा भरोसा दोआया। कार्यक्रम च विद्यार्थियें पास्सेआ सांस्कृतिक कार्यक्रम, अकादमिक ते रचनात्मक प्रदर्शन पेश कीते गए। राणा होरें उं'दी प्रतिभा, अनुशासन ते आत्मविश्वास दी तरीफ कीती ते इन्दे च माहिर बनाने च शिक्षकं ते माता-पिता दी भूमिका गी उजागर करदे होई आखेआ जे उनें बच्चें गी सिखने दा माहौल उपलब्ध करवाया ऐ। उनें दूर-दरेडे इलाकें च पढाई लिखाई सरबन्धी ढांचे गी मजबूत करने ताई सरकार दी प्रतिबद्धता गी दोहराया।

<><><><><><>

BSF-Alert

मौसम च आए दे बदलाव ते बडुलै सबेला पौने आहली धुंध करी जम्मू दे अंतरराष्ट्री बन्ने पर दूरै तगर साफ दिक्खने च किश परेशानी हुं'दी ऐ। एह्दे चलदे सीमा सुरक्षा बल नै चौकसी गी होर निगर बनाया ऐ। स्यालै आहली रूतै दरान गश्त होर बी चुनौतीपूर्ण हुं'दी ऐ। बी.एस.एफ कर्मिं, जिंदे च महिलांकर्मी बी शामिल न, नै निगरानी गी होर व्यापक बनाया ऐ तां जे घुसपैठ दी कुसै बी भैडी कोशिश गी नाकाम बनाया जाई सकै। अधिकारिं दस्सेआ ऐ जे निगरानी आहली बादू उपकरण लाए गए न ते गश्त बी बदाई गेई ऐ। बीएसएफ पूरी चाल्ली सौहगी ते सतर्क ऐ। उनें मुल्खक दी सुरक्षा च बीएसएफ दी पैहली पंक्ति आहली भूमिका गी फही दोहराया।

<><><><><><>

Rajouri-VPN

राजौरी जिला प्रशासन नै आम लोकें दी सुरक्षा गी ध्यानै च रखदे होई समूलचे जिले च सब्बे वर्चुअल प्राइवेट नेटवर्क वी.पी.एन सेवाएं गी तुरत प्रभाव कन्नै 2 महीने लेई मुअत्तल करने दे हुक्म जारी कीते न। भारती नागरिक सुरक्षा संहिता दी धारा 163 तैहत जिला मैजिस्ट्रेट अभिषेक शर्मा हुं'दे आसेआ जारी एह् निर्देश एस.एस.पी हुं'दी वी.पी.एन दे शुबे आहले इस्तेमाल बारै इक रिपोर्ट मगरा आया ऐ। अधिकारियें दा गलाना ऐ जे वी.पी.एन दा इस्तेमाल पंछान छपाने, बंदशें थमां बचने ते मुमकन तौरा पर गैर कनूनी या देश विरोधी गतिविधियें गी अंजाम देने लेई कीता जा करदा ऐ। इस हुक्म दा मकसद साइबर सिक्योरिटी खतरें गी रोकना ते कनून बवस्था गी बनाए रखना ऐ। पुलिस गी इस आदेश गी सख्ती कन्नै लागू करने दे निर्देश दित्ते गे न।

<><><><><><>

Theatre-Series

हफ्तावार रंगधारा थियेटर श्रृंखला तैहत्त कल अभिनव थियेटर जम्मू च आजाद परिंदे कला मंच आसेआ डोगरी नाटक सखाराम बाइंडर दा मंच कीता गेआ। जम्मू-कश्मीर दी कला संस्कृति ते भाशाएं सरबंधी अकादमी आसेआ आयोजित इस नाटक गी दमदार अदाकारी ते जबरदस्त निर्देशन लेई खूब सराहेआ गेआ। विजय तेंदुलकर हुं'दे कम्म पर आधारित एहू नाटक सखाराम दी उलझी कहानी गी दस्सदा ऐ जेड़ा समाज आसेआ ठुकराई गेदियें महिलाएं गी पनाह दिंदा ऐ ते समाजी असलियत गी उजागर करदा ऐ। इस मंडली गी इलाके च थियेटर ते सांस्कृतिक गतिविधियें गी बढ़ावा देने च उन्दे योगदान लेई सम्मानित कीता गेआ। आकाशवाणी समाचार कन्नै गल्ल करदे होई जम्मू-कश्मीर दी कला, संस्कृति ते भाशाएं सरबंधी अकादमी दे संभागीय मुख्व डॉक्टर जावेद राही होरें आखेआ

<><><><><><>

BSF-Youth Felicitation

सीमा सुरक्षा बल-बीएसएफ जम्मू नै पठानकोट थमां पुंछ तगर दे सरहदी इलाके दे उनें नौजोआनें गी कल सम्मानित कीता जिनें हाल च गै होई दी पहली जम्मू बीएसएफ मैराथन च जबरदस्त जोश जज्बा दस्सदे होई शानदार प्रदर्शन कीता। इस कार्यक्रम च सरहद लागे रौहने आहले नौजोआनें प्रतिभागियें दी दलेरी, पक्के धेइयै ते जिस्मानी दमागी फिटनेस दा जश्न मनाया गेआ। बीएसएफ अधिकारियें उंदे बेहतरीन प्रदर्शन दी तरीफ करदे होई आखेआ जे उंदा समर्पण समूलचे सरहदी इलाके लेई मान दी गल्ल ऐ। बल नै इनें नौजोआनें गी समर्थन देने दी अपनी बचनबद्धता गी दोहराया ते उंनेंगी खेड्डें ते होर दुए रचनात्मक कम्में च बेहतरीन प्रदर्शन करियै नमियां उंचाइयां छूने लेई प्रोत्साहित कीता जेदे कन्नै जम्मू ते सरहदी इलाके दे होरनें लोकें गी प्रेरिणा थ्होग।

<><><><><><>